

Troita

Nº 38

Boletín Informativo do Concello de Oroso

Maio 2016

A XX Festa da Troita aposta por atraer a unhas 30.000 persoas a Oroso



A **Festa da Troita** celebra a súa vixésima edición do 6 ao 8 de maio. "E neste aniversario tan especial, dende o Concello quixemos elaborar un programa que incluíse actividades para todos os gustos e para todas as franxas de idade. Queremos que todos e todas deixen a un lado as preocupacións do día a día e o pasen o mellor posible durante estes tres días", explica o alcalde Manuel Mirás. Pola súa banda, Luís Rey Villaverde, concelleiro de Cultura e coordinador da Festa da Troita, indica que "se o tempo volve acompañar penso que podemos superar con creces os 25.000 visitantes do ano pasado e achegarnos máis ás 30.000 persoas. Para iso contamos tanto cun atractivo cartel de orquestras coma cun récord de participación na degustación de troitas do domingo".

Así, do 6 ao 8 de maio o **Festival Oroso en Vivo** traerá á alameda de Góis ás mellores orquestras de Galicia: Cinema e París de Noia (venres 6), Metrópolis e Los Satélites (sábado 7) e Bahía Blanca e Combo Dominicano (domingo 8). Tamén se mantén a exhibición de baile latino e country (sábado 9, ás 19:00 horas) e os distintos grupos locais, que realizarán varios pasacalles e actuacións durante a fin de semana.

A **Feira da Artesanía e os Oficios** contará cuns 25 postos, entre



os que se inclúen casetas de artesanía e de alimentación artesanal, carrusel de animais mitolóxicos e distintos espectáculos ao público. Dentro desta feira terá lugar a **II Feira da Cervexa Artesá de Sigüeiro**, na que se presentarán máis de 30 variedades de cervexa, haberá un sorteo de lotes de cervexa artesá e un cortador profesional de xamón.

Os artistas da Asociación de Amizade e das Artes Galego-Portuguesa, ademais de amosar as súas creacións na sala de exposicións do centro cultural de Sigüeiro (a mostra inaugurárase o venres 6, ás 20.30 horas, no centro cultural), estarán o sábado en diversos lugares do municipio amosando as súas técnicas e creacións.

Así mesmo, a **degustación de troitas** do domingo 8 de maio superará o récord de establecementos colaboradores: pois contará coa participación de 39 bares e restaurantes, que ofrecerán troitas con cada consumición. Luís Rey destaca e agradece "a colaboración destes establecementos que participan na degustación de troitas e que fan un investimento importante para poder agasallar á súa clientela". Unha degustación de troitas que terá lugar de xeito paralelo á organizada polo Concello de Oroso na Alameda de Góis, que repartirá 300 quilos ás 12:30 horas, o que sumará máis de 3.500 quilos de troita.

O **pregón** será ofrecido polo presidente da Deputación da Coruña, Valentín González Formoso, ás 13:30 horas, coincidindo coa entrega de premios do **campionato de pesca**. Un acto que será presentado polo actor Luís Iglesia e que rematará cun xantar popular na carpa anexa á Alameda de Góis.

E **para os máis cativos**, ademais do Campionato de Pesca Infantil no Carboeiro, tamén haberá uns obradoiros infantís, a actuación de Peter Punk co espectáculo circense "Peor Imposible" e os xogos populares de Garabato de Xogos. Todas as actividades infantís serán na praza Isaac Díaz Pardo.



Descarga a APP no teu móbil dende www.concellooroso.com, envíanos as incidencias que vexas e resolverémolas o máis axiña posible





Instalarse unha baranda de seguridade ata rotonda

O Concello inviste 60.000 € na senda peonil de acceso ao CEIP Camiño Inglés



O Concello de Oroso vén de iniciar as obras de construción da **senda peonil na N-550**, que conectará as beirarrúas de acceso ao CEIP do Camiño Inglés coa Alameda de Góis. Unhas obras nas que o Concello investirá 60.630 euros e que teñen un prazo de execución de 2 meses, aínda que o alcalde Manuel Mirás agarda que estean rematadas antes. "Temos

que pedirlle desculpas aos veciños polo atraso considerable que acumulan estas obras, primeiro polas modificacións que foi pedindo o Ministerio de Fomento e, nos últimos tempos, porque estivemos á espera de saber por onde virían as augas pluviais que se recollan dende a nova entrada da AP-9, pois diso dependería o diámetro do tubo de pluviais que se vai instalar nesta nova senda peonil", explica o rexedor orosán.

A nova senda peonil discorrerá pola marxe dereita da Avenida de Compostela e as súas características serán idénticas ás das outras 8 sendas xa existentes: dous metros de ancho, cunha base de zahorra artificial compactada e 15 cms. de formigón. A maiores, o Concello de Oroso instalará unha rede de recollida de pluviais, aparcadoiros e unha baranda de protección ata a rotonda da N-550. o paso de peóns solicitado polo Concello quedará a 66 metros da rotonda, de acordo coas especificacións aprobadas por Fomento. Estas obras únense ás realizadas nos accesos ao CEIP de Sigüeiro, que permitiron duplicar o ancho das beirarrúas.



O Concello entrega os premios o I Certame de Investigación do Camiño Inglés

O centro cultural de Sigüeiro acollerá venres 13 de maio, ás 20:30 horas, o acto de entrega dos premios da primeira edición do **Certame de Traballos de Investigación do Camiño Inglés**, no que hai establecidas tres categorías: investigadores, peregrinos maiores de 18 anos e mozos/as menores de 18 anos. A asistencia é totalmente libre e de balde. O concelleiro de Cultura, Luís Rey Villaverde, amosouse moi satisfeito tanto polo número de traballos presentados como pola calidade dos mesmos.



Publicadas as listaxes provisionais nas garderías da Ulloa e Chousa Nova

O Concello de Oroso vén de publicar na súa web (www.concellooroso.com) as listaxes provisionais de admitidos nas escolas infantís da Ulloa e Chousa Nova, polo que o prazo dispoñible para a presentación de reclamacións estará aberto ata o vindeiro 13 de maio. As listas definitivas de admitidos publicaranse o 30 de maio na propia páxina web, de xeito que as familias poidan formalizar a matrícula entre o 1 e o 10 de xuño. Os impresos poden descargarse dende a propia páxina web.





A canteira orosá non deixa de conseguir éxitos

Un día si e outro... tamén, a canteira orosá non deixa de conseguir éxitos nos máis variados deportes. Nesta ocasión temos que felicitar ao Club Xadrez Oroso, que segue a facer historia ao proclamarse Campión da Liga Galega de Xadrez 2016 despois de permanecer no primeiro posto durante as 11 xornadas do torneo. Isto supón o ascenso de categoría, o que suporá que para o ano que vén Oroso Norte e Sur xuntaranse para formar un gran equipo na súa andaina na nova categoría. Mentres, a rapazada do Xuventude Oroso segue a sumar título tras títulos. Os últimos foron os Infantís "B", que se proclamaron campións de liga e ascenderon a 1ª Autonómica. Previamente, os Benxamíns tamén acadaran o título de campións de Liga con varias xornadas de adiamento. Parabéns a todos/as!




Novos cursos para a Aula Mentor EducaOroso

A **Aula Mentor EducaOroso**, oferta dous novos cursos formativos relacionados coas novas tecnoloxías: "Creación de tendas online: e-commerce" e "Internet útil". A matrícula en calquera dos dous cursos pódese realizar na Aula Mentor EducaOroso (rúa do Deporte 7, Sigüeiro) ou no 981 688 950.



Últimos días para presentar candidatos á Gala da Cultura

Últimos días para propoñer candidatos á III Gala da Cultura do Concello de Oroso. Hai catro categorías: premio á Traxectoria, premio á Promesa 2015, premio á Asociación/Entidade e Premio á Empresa que en 2015 potenciasen a cultura. Máis información no centro cultural de Sigüeiro (981 690 903).



FOI NOTICIA...

Gran éxito do camiño escolar seguro "Caracole"

Máis de medio centenar de nenos e nenas de Oroso participan no proxecto "**Caracole**", unha iniciativa de educación viaria posta en marcha polo Concello de Oroso, o CEIP do Camiño Inglés e a ANPA Carboeiro que busca que o alumnado poida acudir ao colexio de forma autónoma e con total seguridade. A iniciativa conta coa colaboración de Protección Civil e da Policía Local, así como de varios establecementos comerciais de Sigüeiro.



Récord de participación no Concurso de Tapa en Tapa

A cafetería "Os 6 Ríos" e a tapa "O segredo dos 6 ríos", con 524 votos, gañaron o primeiro premio do **VII Concurso de Tapas** do Concello de Oroso, no que se degustaron unhas 4.500 tapas, o que representa un récord no certame e un 50,3% máis ca na edición anterior. O Bar Tapas foi o segundo clasificado, pois as súas "Milfollas de tenreira" recibiron 483 votos. Completa o podio o Sigu Café, cuxa "Tosta de lombo" recibiu 393 votos. Parabéns!



Unha ducia de veciños e veciñas participaron nun obradoiro de maquillaxe e caracterización organizado polo Concello no seu programa de Obradoiros Culturais 2016. Un taller de 8 horas impartido pola Escola Galega de Tempo Libre.



Máis de 600 persoas participaron nos actos do **Día das Persoas Maiores**. O alcalde Manuel Mirás anunciou que o Concello está traballando, en colaboración coa Xunta, para incrementar o servizo de axuda a domicilio.



O Concello segue achegando as actividades do Observatorio Astronómico aos nenos e nenas de Oroso. Neste mes de abril xa participou o alumnado do CRA Oroso e do CEIP Camiño Inglés cunha charla sobre a exploración espacial.



Máis de medio milleiro de atletas

Amador Pena Torreira (C.D. Vagalume Energía) e Elena Matalobos Redondo (Sociedade Deportiva Barbantia Roda) foron os gañadores absolutos da **IV Carreira Pedestre Concello de Oroso**, na que participaron un total de 543 corredores. Uns atletas que contaron co alento de centos de veciños e veciñas de Oroso, que aproveitaron coma nunca o bo tempo para gozar dunha tarde de deporte e para aplaudir o esforzo dos corredores.

